

酒

邊

詞

賭棋山莊集 酒邊詞四

長樂謝章鉞校如

采桑子

畫闌西畔蛩聲悄天也陰陰人也陰陰細雨斜風冷不禁
薰籠獨倚傷心甚不願如今竟到如今昨夜門前落葉深

南樓令

斗酒屢經過春深奈樂何好花前獨自婆娑蝶懶蠶癡鶯又倦
卻看我醉還歌春夢半成婆春愁尙著魔莽乾坤苦把人磨
三十年來新舊恨心上滾似層波

百字令

醉極作視芑川時芑川將渡海供職

男兒墜地要足行萬里名垂千古塵海茫茫知己少且作深山
卧虎仰首看天清風明月入室差堪侶陶然醉矣狂奴無奈目
努況復江北苦饑江南苦旱缺憾誰能補故國回頭還一樣
孰摻罵曹之鼓百丈柔腸終朝九轉詎爲離愁苦此中情味舍
君何處堪語

紛紛世界謂從來名士一錢不值願汝中流爲砥柱且向龍門
努力此後相離幾年再聚所就應殊昔冷官亦可故人聽汝消
息堪嘆今古才人爲天所限老盡凌雲翮說短談長刀筆吏
誰諒當年心跡勢若可爲時乎難再此會休輕擲江山得助文

一剪梅

轉瞬春光又柳條風也蕭蕭雨也蕭蕭他鄉惆悵是花朝醉也
寥寥醒也寥寥舊夢何堪話玉簫山也迢迢水也迢迢寒燈
獨照可憐宵人也遙遙信也遙遙

生查子

郎嘆儂便愁郎笑儂先喜郎是合歡花儂是相思子 郎作芙
蓉妾儂作鴛鴦履夜夜好溫存日日同行止
望郎眼欲穿郎至雙眉皺儂覺近來肥郎卻十分瘦 撥火薰
郎衣探手儂郎袖郎自遠方來竟體寒風透

金縷曲

壬子初度

三十三年矣。既天地生儂，也要爲儂位置。詩瘦酒狂，書又腐，看
冷冷清清地，苦飄零。關山清淚住，旣不能歸，未得淡酸鹹嘗，偏
傷心味，參不透蒼蒼意。古人之側，甯吾棄，莫造就浮名反在。
雕蟲小技，愛者欲生憎，欲殺不盡區區文字，醉而已。那知許事
今夜嚴霜應更惡。祝東風吹暖萬家，被休辜負平生志。

不合遲之久，令斯人登牀捫腹仰梁搔首，變態古今都閱盡。髮
短鬚長，眉皺竟開卻拏雲妙手。異日麒麟堪圖畫，恐英姿颯爽
非其舊。還說甚長生酒。今年已往，明年又便，吾輩才疎不應
郡無成就。萬事未能誇捷足，墜地也居人後。天謂我相期甚厚。

昨夜綠章香界去有水仙嫵媚靈梅瘦看花宴簪花壽

鸞環曲

願作鴛鴦枕莫作芙蓉帶枕受夜來情帶自黃昏冷到明
昔說同心話今欠相思債寶押總鸞環帳內溫存帳外寒

金縷曲

感遇

隱跡兼埋姓算已非從前面目還憂人認日學史公牛馬走呼
馬呼牛都應夜則剩亂蛩獨聽旣坐復行行復坐怨西風不管
吾衰甚偏百樣添來潮 有時萬感心頭迸把見聞都忘恰似
枯僧入定第一多愁須排遣況復生平善病好年華漸非鼎盛

仰首看天低首坐也有人說道貪清淨繞朝策誰能贈

滿江紅

疊韻答肖巖

閉門苦寂忽聞剝啄聲出視則肖巖也喜極乃

而幼好奇服安知茶蘭之釋於蕭艾乎誠我

福心約君降格然而肖巖曰君言何其奮也

無可奈何藉解脫破除寂寞算浮生愁城難墮肯填欲壑趨熱

誰憐孤竈冷避喧猶恨重牆薄甚東風作祟弄羣花開還落

門雖靜書難讀山雖秀泉偏濁總纏綿醉夢循環悲樂甚事干

卿偏撫髀有人助我齊張目儻到頭尙不與回頭天應錯

鄧禹笑人三十載風塵寂寞好一付鬚眉埋沒詩書之壑聽雨

應知愁雨切停雲不逐流雲薄且當筵哆口縱狂談天花落

致君策律宜讀送窮法心宜濁要與豕同游呼牛亦樂奔走先
除疎懶態唯阿莫謂光明目算從前身價太錚錚先生錯

醉公子

臨池

眉子彎彎硯帖好簪花顫斑管不勝寒何曾畫遠山 畧解相
思字便寫相思意欲寫又遲遲偎人一笑時

南鄉子

習詠

瘦骨可憐生猶自溫詩記舊盟忽見關心雙字在卿卿似聽箇
儂低喚聲 昔日萬丁甯今日行間淚點盈怪底芙蓉三寸管

明明訴盡背人欲語情

長相思

刺繡

情絲絲淚絲絲繡出當時人影兒繡雙不繡奇
花枝枝柳枝枝花是儂家柳是伊針神接引之

喜遷鶯

品茶

寒共暖試猜詳一味愛清涼不知何福作壺觴消受口脂香
卓女愁相如病消渴由來共命瓠犀僥倖得親嘗卽此是瓊漿
唐多令

調絃

一曲送征鞍春風剗地寒諱別離不譜孤鸞只願卿卿如寶瑟
長傍妾鏡臺端點拍覺麝安低眉續續彈喜新詞卻號合歡
卿解偷聲儂解唱誰則道賞音難

生查子

賭酒

沽酒盡郎歡切莫醺醺醉醉則發狂歌不管人兒睡
郎醉儂能扶儂醉郎休避一夜枕郎眠閒卻鴛鴦被

唐多令

不管瘦腰肢相思獨自支小燈兒點盡殘輝此際香篝熏被坐

想屈指數歸期 銀箭夜遲遲人孤影亦微向夢中辛苦尋伊
若要箇儂同卧起繡姓字貼身衣

百字令

長夜不寐百感駢生挑燈拈墳此調拉雜淒涼遂得入閨讀
一過不自知其淚之簌簌也

我初墜地看烏衣門巷清華家世八表曾公猶健在試睥謂兒
甚慧金馬明廷文章作貢肇錫覘成器一堂歡笑此時恍佛能
記 轉眼風折萱花慙遺余仲尙不能兒戲委土麻衣纔尺半
無母弟兄何恃我借慈雲寄人膝下姪也從姑矣淒涼歲月旁
觀過者猶涕

鑑生曾大父名之曰章鑑字
之曰崇祿期以文章貴顯也

朝朝暮暮記空房獨閉空牀獨倚匍匐不知乾與溼阿保虛文
而已大父常言是兒不死亦藉蒼蒼意不然而母九原冥福能
庇六歲七歲之時習勞就賤恐拂嚴親意堂上多愁常拚酒
強半長宵無寐鬼手蓬頭殘衫破帽子弟眞爲隸零丁獨苦池
塘欲夢何地先公嘗謂錕曰士有隸子弟汝當不愧先弟就撫於大父是時已天

十年以長記沈腰消瘦醫言不治夜靜燈昏聞鬼嘯想是慈魂
墜淚四載依牀將書破悶畧解其中味之無未辯揣摩相會以
意從此漸慕名場澄懷軒下垂手談文字大父謂兒當自愛
勿溷雕蟲小技二十三傳青箱世業一髮千金繫士先器識讀
書所爲何事

太邱門下

秋農先師

記飄零總帳傳經之地座有景陽

任如張君

能白眼

蘭蕙偏投臭味管仲非貪子淵亦空署券東鄰質小人有母嘗
羹猶藉君遺那曉天奪斯人回車一痛慘淡心先死每愛出

門消積忿勸我逢場歡喜金石交情文章畏友長夜誰知己他

生有約此言甯是遊戲

任如名仁恬侯官人有俊才歿已九年矣

不情不緒看燈前酒後淚痕難制只欠吹簫常托鉢屢害毛錐

短氣煮字療饑臯比偶擁喜怒隨人意旁觀還道秀才不是利

器無數屋內酒人堂前債客門外催租吏得意驕鷹爭攫肉

旁有斷腸燕子少婦吁嗟曰卿且去忍死待時耳能禁磨折英

雄大半如是

故人招我看騎雲控鶴大饒仙氣此際感恩知己最九十九峯

散吏

芑川戊申芑川招余讀書甯德

慰病尋醫澆愁泥酒愛我生人忌還邀元

晏練都論定文字

芑川刻外丁卯橋居士集止余一序

當日期望成名中原旗

鼓并將騷壇幟那曉數奇侯未得狙擊依然失意浮海欲從滄

溟滌筆又被風吹避牙琴各抱屋梁月照衣袂

已酉余已定秋榜第十三數日

後忽改置副車名數如之崔小溪房師極爲惋惜芑川尤扼腕不已

鵲鵲夜叫看衰門骨肉團圓非易一表陳情難卒讀腸斷蓼莪

又廢遺累如山冰霜破屋搶首呼天地素冠亂髮依人又向千

里

聊復御李

少業攀黃省

魚鹽溷跡走險謀生計事敗將成誰

任咎回首關河心悸蘇小鄉親高三十五

文樵

爲我添憔悴無臺

賂棋山莊集

詞四

九

避債填詞相向垂淚

嚴寒至此看沉埋難了壯夫意氣一枕九州龍虎夢聲價何關
朱紫結客忘身對天有眼手散千金矣茫茫世路付之一笑爲
是卻嘆腹轉車輪口嚼石闕九紙充雙耳照鏡頭顚差不惡
時把鬚眉料理紅粉聽歌青衫說劍嘗盡飄零味卅年辛苦哀
歌滴血成字

滿江紅

題高文樵

思齊

瀟湘聽雨圖

帝子去兮剩千古悲秋之地况又值水凝雲倦老天欲寐自向
煙波尋窟宅且將詩酒供游戲只瀟瀟一曲念家山難安置

說不出相知意拭不盡相思淚倩簪管寫得個人兩字把卷卻
憐同調遠扁舟滿載愁滋味算連牀對話更何時君須記

前調

菁城話別諸作

友仁精舍在菁城北門外余招諸同志敘別其中酒酣聯句題壁既歸文樵疊韻送余行

余亦和答又數日適逢重九登高復疊前韻所作愈多文樵圖爲長卷且命余敘其首余亦謄爲副本真一時勝概也茲錄余作其聯句并諸君和作則已戴友仁精舍雅集錄矣

且住爲佳問此後誰憐寂寞怎忍說一觴一詠一邱一壑癡癖

纏綿因酒熱勞身消瘦如花薄看長空歸雁帶秋心聯翩落巖

幼臣以鄉試歸少

白又與余同行囊中句還能讀杯中物休嫌濁算弟畜灌

夫相知差樂萬事難遮時輩口一生求入青天目便化雲猶得

逐神龍光離錯

匹馬南歸一千里風塵索寞看不盡閒雲出岫亂泉奔壑書味
能刪吾免腐交情不語人疑薄問平生淚灑別離無今番落
新詞就登樓讀離樽抱當筵濁歎既難會面得書差樂一夢黃
梁醒倦眼千秋青史爭名目算許多末路誤英雄君休錯

醉酒不休這幾日渾忘寂寞更揮毫如鶯出谷如蛇赴壑好雨

有聲留客緊遠山如夢依雲薄把聚紅佳話祝燈花花休落

初

錄同好滿江紅詞界文樵且係之日異日杯酒相逢各抒長技
獨爲聚紅詞社可也文樵欣然因自稱聚紅生並鐫一印贈余
曰聚紅社中人是夜燈結花四既又
苗一總文樵笑曰是所謂聚紅也

度支傳君曾讀貨殖者

人原濁算多文能富雖貧亦樂恨事難消吾輩血狂言爭努勞

觀日學虎頭投筆去封侯方非錯

倦眼還開喜佳節不曾寂寞倩西風離魂扶起經邱越壑不合

先歸餘汝闕

文樵擬來春歸

偶因後至疑情薄

是日余偶後到文樵極盼望

看疎林

幾葉挂秋雲憐搖落

詞絕妙君應讀

余以絕妙好詞贈文樵

花爛漫人

非濁

文樵填詞處日聚紅軒欄花長春各一

便淺斟低唱浮名亦樂獨抱癡心彈

古調休將傲骨驚時目

文樵以三言贈余日勿恃才

莫人生一著不分明如

棋錯

便是笑言這心下依然寂寞看送者自崖而返淚波盈壑負累

如山徒自苦消愁有酒終嫌薄怨當秋不合種垂楊蕭蕭落

笥有字休重讀頭有髮真成濁欲飯依菩薩幟除悲樂世自登

臺求馬骨君休入海尋魚目約化龍雙劍會風雲光交錯
輒令人思算浮名尙非寂寞一千里歸懷直注浴鴉之壑自有
天心休著急無非世態何嫌薄嘆嫦娥孤冷尙多情遲遲落
書亦壞奚須讀人旣染還餘濁添一番閱歷云胡不樂屠馬末
羈終折足腐鴟相嚇眞驚目聚六州生鐵鑄難成今番錯

永遇樂

得文樵書感懷卻寄

嗟聚紅生寂寂溪山阿誰知汝碧海騎雲霓裳自奏下界無人
語遙天有眼大星見角出沒羣魚亂舞抱幽蘭一枝獨笑歸去
五雲深處 熱塵九斗離愁一斛兩岸落紅如雨歌不能狂言

還畏罵酣睡尤辛苦何如飲酒解衣槃礴自謚騷壇醉虎招故
人元龍樓上共分千古

蘇幕遮

不寐有懷

簾垂波燈縮豆冷月窺窗正是相思候作意秋風欺我瘦一縷
新寒特向羅衾透 殘停斟針倦繡眼角心頭迫出眉痕皺小
印綢繆還似舊默祝幽花人也如花壽

惜分飛

倚調酬張軒叔

承渠

猶記碧桃花下路小徑落紅無數門掩秋風暮玉簫暗度銷魂

句未必玉顏能似故只爲多情自悞一樣傷心處錦袍不遇
輸紈袴

漫說浮萍分又聚惆悵暮雲春樹江水真無趣不流人住流人
去此後魚書重叠訴努力自家調護莫向樓頭覷饑鴈不語
啼鴉怒

憶秦娥

霞漳紀豔

燈花熱門前招客橫波瞥橫波瞥捧心憨笑金釵欲折無端
難把情絲絕有緣又恐愁根結愁根結奔流似水團圓望月

前調

觀劇

歌聲咽登場裝束腰肢削腰肢削秋波一轉送迎雙絕 羅衫
如漬紅榴血金釵斜顫青絲髮青絲髮爲誰留戀眉痕暗結
滿江紅

羈居誌感疊菁城話別韻

複壁趙岐更今日不堪寂寞數知交恰如覆水東西歸壑癡坐
不知銀燭燼孤眠錯怨羅衾薄睡未成饑鼠忽啾啾梁間落
神肯助書休讀仙能笑花非濁但多愁似我累卿不樂采綠人
牽千里夢留青天覷他年目拚者番摧折博長生甯爲錯
憶秦娥

獨夜苦寒

空房警銀燈長爇僂僂寢僂僂寢追歡無夢伴愁有影
別離滋味儂長領被窩縱窄寒風緊寒風緊心兒愈熱身兒愈冷

滿江紅

爲肖巖題吳清夫所藏汪稼門尙書梅花詩扇冊

歲壬子余抱幽憂浪

游自排遣一二知己惠書省間述所見聞皆堪痛哭適肖巖寄此册相示欣賞累日夜不厭因思昔日尙書治吾閩政舉法行時國家稱極休盛而册中唱和諸君子如吳清夫伊墨卿亦各能出所樹立以自顯於世及今幾何時竟令人累歎增歎而莫能自解邪十月余行經泉南見道旁薪者皆焦燬無枝葉詢其故始知前日劇盜方出掠治之不得官乃縱兵焚其十數鄉衆悉趨入海此其燼餘之物嗟乎付之一炬中安知無梅花哉

嚴凍一天偏做出江山春色纔曉是調羹手段消寒骨格香暗

不招蠶蝶鬧枝高故耐冰霜逼幸賦花人盡鐵心腸花非陋

宜愛護休摧摘今忽悴誰之責冷相思無著檐低月黑夢斷忠

貞祠下路埋香也化蕞宏碧囑瘦魂莫向隴頭消招應得范忠貞祠

下有梅一宋代物也逆夷盤踞是山欲縱尋斧先數日竟憔悴死

賭棋山莊集 酒邊詞四

賂棋山莊集 酒邊詞五

長樂謝章鋌校如

沁園春

述醉諧言

插腳塵寰三十三年一瞬之間奈少猶了了頗能驚座長偏寂
寂未必名山腹既負人頭還責我抱石而眠骨相頑西風起漸
二毛作祟雙鬢成斑 愁多如草難刪更腸曲如河轉九彎豈
男兒識字常多憂患文章憎命并苦饑寒甚矣吾衰不因人熱
五噫哀歌惜伯鸞行復坐嗟寸心渺渺長夜漫漫

自起開門有蟾蜍蝕月蟋蟀悲風算濫竽幾處依人門下狂琴

三弄步我江東且食蛤蜊休爲蝨蝨底事懊儂與惱公顛狂甚
把古人數盡幾輩英雄 吁嗟魏絳和戎偏烽火潢池出沒紅
蓋窮無所往遂如瘖狗急則生變猶是哀鴻官府愛錢那知許
事長技無他啞與聾度支急更饋糧千里拮据司農

馬遞狼烽雜沓而來將安歸乎嘆海水羣飛樓蘭未斬山林嘯
聚野蔓難圖畫角雲屯大旗日落富貴高陽舊酒徒真將軍有
兩行檀板十斛明珠 壞牆月黑啼鳥染碧血江城弱草枯笑
獻策曉曉山中宰相書空咄咄江左夷吾大貝誰行漏卮未塞
粒米登倉一飽無塵埃起向磨刀聲裏泣別鳴鳴

自古書生最工痛哭否則狂歌問甚事干卿漁陽搥鼓因人抱

憤漆室投梭小杜罪言香山諷論辛苦文章爲甚麼忘情罷奈
聞雞起舞熱血猶波 風塵廿載經過剩一刺懷中姓字磨礪
百年烏兔悠悠如此千秋牛馬碌碌奈何欲采葦蕸雜之蘭蓀
依附而榮學女蘿行不得聽鷓鴣鵲外喚徹哥哥

滿江紅

意氣猶龍便自己尙難摸捉只今日風風雨雨低頭矮屋看劍
時聞雷煥笑上書不效陳東哭想脫衣長向酒家眠眞爲福
蕭蕭鬢錚錚目垂垂手皤皤腹笑量才八斗量愁一斛日月爲
誰天上轉江山怪我人間獨說甚麼火色與鳶肩飛食肉
憶秦娥

端午同文樵話別蓮花庵

山明滅當窻風緊閒雲裂閒雲裂孤松堪拜幽蘭堪折
千里長鳴咽他鄉忽遇端陽節端陽節蓮花庵下一樽話別
長途別相逢難解相思結相思結一天殘照亂鴉明滅平生
好冷嫌人熱滿腔都抱英雄血英雄血我歌汝哭琵琶欲裂
憶秦娥

泉山阻雨

窻前雨大珠弱線爭飛舞爭飛舞數間茅店絕無人語
白雲未散烏雲補黃沙一角吹塵土吹塵土今朝寂寞昨朝辛苦
前調

既行雨復至中途折回戲作

交相慶今朝得走南來徑南來徑李公祠下風狂雨瀟 泉山

自昔稱名勝天公有意邀詞聖邀詞聖三間破壁留題未竟

前調

同友人縱談作

噲等伍未知何術能千古能千古縱談天下其人似虎 宵衣

肝食愁 明主羽書時響軍門鼓軍門鼓男兒血性敢言辛

苦

傷心甚夫君與僕應同病應同病酒邀人勸歌嫌人聽 熱腸

只恐多年觀私情當把孤燈證孤燈證將山作骨與花共命

滿江紅

石鎮酒後感作

無數溪山斜陽裏蒼黃紺碧間幾輩枕戈橫海佩刀題壁赤日
烘波龍氣隱白雲堆樹鶯聲隔看江頭商女替人憐長爲客
致身業無寸尺謀生累還千百駕長風欲起凌雲之翮不慧真
爲名士福多情猶是書生癖令調羹手段託魚鹽天應惜

百字令

旅寓有感大凡美人工愁况其淪於苦海乎余過興化見林
善斐索是真情海之
尾閭情天之渾沌也

似曾相識嘆天涯海角好春無主帶病含羞難久坐斂袖低頭

延伫螭蚓粧龍鴛鴦伴鴨微露傷心語憐卿憐我情天此憾誰
補那曉百里溪山別開花界山鬼窺人舞遽集於茲無可奈
羞澁客囊最苦我倦欲眠關窗須早多謝河間女昨宵銀燭照
人猶自酸楚

金縷曲

同肖巖論詞頗酣作此贈之

不死狂奴膽眼青青仰天長嘯填詞猶敢得意居然能千古萬
事都忘軻轍七百載風流將斬劉柳騷魂蕭索甚冷江山幾輩
虛名噉爲醉語爲夢魘七百有餘歲謝子不凡
夫芑川水調歌頭句也瘦肩自轉風
騷擔逼真情言歡能笑言愁便慘夜月青燈常惹恨怕聽漁陽

之慘芒作岳軍難撼一見旌旗臣則避坐詞壇欠穩鍼橫毯
君如海僕如坎騷首問青天是我知心惟月多少不團
圓事莫向青燈說肖巖好事近句也

沁園春

續述醉諧言

一想堪疑再思堪怕曾幾何時忽溪風慘慘雙龍欲死湖波滾
滾九鯉皆飛扼要軍忙連鄉計密無奈黃巾出入奇沒來由害
孤城屢閉莫府重移剝牀方痛瘡痍更共命先將肺腑醫看
驕風悻悻喝當頭棒窮途擾擾著短後衣五步爲關一門入籍
守土權分巷陌持醉而飽只里豪亭長樂不云疲
飛禍天來愁遺一老行坐皆愁縱巧婦能炊無財不可大人善

變適野誰謀鑄幣爐青磨刀永赤懽悴籌邊獨上樓四十里這
風聲鶴唳白盡人頭 歸田爭築菟裘况近市精知朝夕求任
常平倉外淒涼饑燕長生庫下蒲服窮鳩三窟堪營一毫勿拔
對面輸心背面仇軍門拜謂下官貧病升斗未留

無可奈何相逢太息醉不成歡算煮海途窮錦帆出沒泛湖計
拙鐵甕彎環菊部箏琶花田脂粉徹夜秋風淚眼乾原頭廟彼
鬼猶求食炙冷羹殘 誤身最是儒冠偏一樣風霜分外寒便
鼯鼠飲河叩門弗應怒猊扶石煮字誰餐嗟太史公真牛馬走
說著文章卽汗顏換不得是告身容易斗米艱難

天亦多愁風風雨雨五日難晴歎四海傷心關河張儉一奇在

腹里社陳平板屋同袍金門推轂真是將軍細柳營姑妄言莫
吳鉤笑我夜氣崢嶸遙空落落晨星接萬里離雲一色青想
書味拋殘橫刀照海芭川琴心冷落藥筆登城文樵在泉州
章西華葛帳叫盡杜鵑夢不成謂京華諸戚友河滿子迸一聲熱淚金
石皆鳴

憶秦娥

中秋同肖巖飲待月不至時余去家已盈年矣

秋風劣吹雲密補青天缺青天缺沉沉簾幙廣寒宮闕
嫦娥應怨夫君拙茫茫下界音書絕音書絕射鳥歸去長生何訣
敲金闕私情誰訴吳剛說吳剛說借將玉斧來修此缺
一年

一度團圓節七年五度傷離別傷離別杯盤幸共何須明月
滿江紅

與端招飲浣霞水榭感贈

愛玩賢妻莫秀才有終焉之志况樂事支婆識曲佳兒解字索
笑花窺明鏡下憐香月媚深閨裏向辛盤賭酒正懽懽朝慵起
肚皮滿詩書氣眼睜得山林意屬池頭好養鴛鴦十二甚事
干卿吹水皺鍾情在我橫琴理聽遠山一角曉鶯啼春深矣
一鏡盈盈肯把這鬢眉照起倚闌干將心訴月碧天如水尙有
知交憐故我何妨喜怒隨餘子問感恩一飯者誰歟王孫是
蟲聲冷拋圖史雞聲惡抽弓矢看蒼黃四海幾家青紫錢外樓

臺難醉夢刀頭日月忙生死且著書謬附古來人窮愁耳

前調

疊韻簡辰溪

不去彈冠戀破帽頭顱寂寞眼睜睜著書門徑藏書巖壑琴有
幽情聲始妙花非絕色香終薄乞碧翁滴露串毫端珠璣落
無絃譜真難讀長生釀休疑濁便閉門養拙園難獨樂湖海祇
今誰把臂江山如此休低目抱銅琶十載鬱風雲蹉跎錯

前調

辰溪出示近詞直迫古作者讀之狂喜疊韻賦此

不暇長歌嘆匆匆終歸寂寞脫非藉尊前排遣便歸邱壑高唱

何如低唱苦古人敢把今人薄能浮名都識柳屯田非淪落

如古篆難輕讀如名畫無些濁儻九原可作孫謀應樂萬竅號

風天又賴一聲擲地人爭目祝他山利器日摩挲經盤錯

辰溪大父

小庚先生善詞著書
數種皆名天賴軒

前調

感懷疊韻

姑妄言之三十載老天寂寞忍著我人間去也終於邱壑矮屋
無聲龍虎倦斜陽如夢江山薄劣東風不會帶幽花飛裊落
摩崖字誰成讀隨車雨休言濁莫出門西笑長安真樂我見猶
憐非負腹臣饑欲死還張目看南朝燕子好樓臺春燈錯

前調

編菁城雅集詞竟疊韻題後并懷亡友芑川任如

滿地干戈又何怪文章寂寞看朝夕風雲變態埋愁無壑更有
何言心已碎不能濟世才終薄嘆窮途無數鄭元和蓮花落

夜臺信誰堪讀高陽酒祇餘濁渺茫茫獨自人間何樂聞笛屢
嘗懷舊膽投戈長挂愛時目便編摩不是勒燕然書猷錯

憶秦娥

花朝後一夜夢芑川話良久繼之以泣醒時枕溼其半長夜
不寐聽瓦上雪聲淅淅填此志痛是日蓋芑川初度之辰也
聲淒切昨宵苦雨今宵雪今宵雪更長夢短布衾似鐵 東皇

不放春風熱酒杯
冷落花朝節
花朝節懷簾陰
館啼鵲皆血
懷

陸館芭川

著書處

金縷曲

同辰溪譚藝并語近事

萬事渾如戲
戲場中那般伎倆者
般聲氣耐冷
嘶酸兼養腐
纔寫幾篇文字
忽夜雨打窗而至
落葉也知人意倦
一聲聲吹到傷心地
悠然嘆頽然寐
硯池也想餘波
闕奈之何淋漓滿紙
又忘禁忌
雞肋尊拳安不足
君怨醉人爲是分一席
名山位置
譬彼飛花
裊與溷
這憐才都在蒼蒼意
休辜負浮生寄

勿笑雕蟲技
忽然間著書仰屋也
關間氣不向沙場包馬革不

覓蠅頭小利冷黃蘄蔽之何味君肯吹簫吾擊鼓聊逍遙莫話
人間世歌而醉醉而寐 古人比我先垂淚但我比古人更見
許多恨事階下寒蛩啼不歇牆角好花又墜算七尺也非容易
偏要登場爲傀儡把衣冠顛倒供兒戲君姑守頭巾氣

百字令

清明懷芑川時芑川柩阻賊廈門

紙灰飛也柳青青千里關山一髮人瘦刀肥烽火大漂泊歸魂
目豁掌上輕身心頭熱肉萬事陰陽割蕙叢并駕淩波辛苦羅
襪 芑川凶問至數 昔日君曰男兒激昂杯酒終始憐南八川
嘗惠書曰僕於閣下愛敬 破帽殘衫還若此辜負世間欲殺笛
俱極以此始者願以此終

不堪聞琴誰並鼓棒亦無人喝杜鵑聲裏愁續舊日書札

無期相見好文章更恨蛟龍能奪

芑川近作
盡歿於海

差幸當時留一卷

塵眼金篦刮瓜步煙荒桑乾月苦骨肉刀邊活夫君便在出

門也嘆泥滑

渺渺海水海山化為精衛銜石填還關生子當

如李亞子休墜長城衣鉢大府憐才禮臣議

卹也算窮官達

幾時埋玉踏青杯酒澆渴

臺匪倡亂芑川力疾守陣數十晝夜
以勞瘁卒大府入告得卹卹典

金縷曲

遇興化故人夜話

何計將天哄急攘攘如衣包火如絲纏纒曲突徙薪還益熱只
慮請君入甕熟不得黃梁好夢九十九灣山水窟看烽煙有腳

天無縫城頭鼓聲聲痛 西風簾捲花魂凍飄零盡饑鶯駭燕
悲吟相送萬事破除無過酒今夜酒多愁涌毛錐子留之何用
不敢棄繻惟痛哭想終軍冷笑長沙慙低頭耳吾從眾
清平樂

辰溪邀邱少蘭 携酒過話時少蘭新歸自建甯

一江春水一樵歸來矣好句近來還有幾病骨闌珊若此 烽
煙滿眼淒其澄清攬轡何時鸛鶴尊前對舞樂夫天命奚疑
淒淒苦雨草草離人語孤負好春還幾許今夜一燈照汝一故
交半似飛煙閒情誰覩陳編抱得熱腸九轉且歌且醉而眠
都無物長且把浮名享閉戶自吟時自賞也有知音三兩 井

華水冷淒涼後村別調誰長莫笑南風不競有人自大夜耶
雕蟲小技索得筌蹄未海上成連腸斷矣滿紙鮫珠無字謂芭川
石林尙有佳兒一軒天籟自怡竊欲分伊碎錦夢中全付邱
遲

采桑子

端五索居閉門苦雨十載舊事枵觸上心拈筆展卷遂得十
二閑

一天苦雨無情甚大漏如濤小漏如毛矮屋低頭不敢豪門
前債客雁行立耐盡煎熬說甚風騷角黍誰人贈老饕

當年匹馬騎雲去白鶴山陬把琰登樓醉拔干將作酒籌故

人謂我真豪駿刮得雙眸看汝封侯坐客聞言盡點頭

飛花又向陳根戀獨守故園長閉柴門簫鼓斜陽付斷垣 小

山叢桂能招隱別有溫存值得銷魂衣上啼痕雜酒痕

馬卿空抱題橋志孤負爺娘蕉萃姬姜無計療饑去故鄉 蓮

花五日登高節忽遇詞狂家在錢塘杯酒題紅各斷腸

歸來應被馮公笑食也無魚出也無車濟世思爲平準書 賃

春何處因人熱寂寞居諸慚愧吹噓一尺文章七尺軀

海山奏罷成連曲有數知音無數傷心理玉匆匆宿草深 就

中更有銜恩者百感沉沉一室陰陰佳節相思淚滿襟

卧伊樓對懷滕館見我當時脫帽酣嬉笑喚楊修作小兒 而

今聞笛淒涼極飽則張頤醉則低眉新鬼應如故鬼肥

卧伊樓任如讀

書處

同門六翮誰高舉偶爾相逢半是飄蓬風閃殘燈不易紅買
絲欲續千秋命禿已如翁狡不如童莫作人間亡是公

羽書如火神州急倉猝投鞭黯淡淩煙回首昇平二百年城
頭月黑寥寥鼓控得弓弦買得鞍轡萬里江山黯黯天

誰人能會蒼茫意且放狂歌萬事由他飛將曾爲醉尉訶鷺
肩火色無聊賴醒眼如蠶腫背如駝不出斯人理則那
雕蟲便是區區技不遇羊欣怎許題裴論定名山重幾斤人
生富貴何時也莫再云云自鑄風雲法曲釣天醉後聞

婆娑起舞閒愁捲典盡羅衫賣盡荆簪家宴團圓一日酣伯
鸞況有齊眉婦習苦能甘舉案還諧益壽何妨醉二參

是日內子生辰

滿江紅

懷文樵惠安

忽忽三年四百里孤鴻飄泊姑負盡金烏玉兔對牀舊約短水
作波鵝鴨鬪斜陽下樹雞蟲樂誤鷺肩猿臂好鬚眉渾無著
何時舞瓊紈鶴何處避啁啾雀看東勞西燕銷魂寂寞坐我誰
能天馬控望伊終願神龍攫若有人屠狗市門呼予將諾

前調

余以事之溫麻肖巖贈詞讀之惘然

扶漢分章這手段豈眞虛設奈近日畏人似鼠趙岐複壁南北
屢隨孤雁渡官私誰向羣蛙別對半鉤斜月四更天離舟發
言不出腸千結磨不盡肱三折莫黃金點後竟成頑鐵一飯炊
完生死夢三杯話斷興亡劫嘆樹猶如此我何堪秋風括
好月當頭笑吟吟鬚眉欲活渾不解海何以淺江何以闊天下
幾人頭項好尊前看汝肝腸熱剩懷中一刺又三年將磨滅
舞也怕寶刀折歌也慮唾壺缺擬短後之衣射生飲血無賴應
從屠狗混多情偶把雕蟲洩聽秋墳鬼唱古夷門聲嗚咽
臣之壯也不如人無過帖括今將老埋頭矮屋賣文求活驢券
徒貽知己笑龍門肯助凡人跼問果然一字一縑無眞羞煞

團團月蟾能齧迢迢水魚偏渴算不合生來騷腸賦骨法曲那

容垂手唱講章難把高頭抹更偷光鑿壁照鄰家吁嗟闕

闕語謂著

日闕余近爲人點定制義有分潤者戲及之

北斗南箕看上界星辰明滅修八萬四千門戶吳剛力竭斲石

已憐精衛苦支機更怨牽牛別莫玉塵輪盡尙彈棋爭殘劫

巨漚戴山猶凸羣魚竄波將裂若有人拍案酒寒刀熱屠釣豈

無奇男子江山要費真心血且擁衾一覺待干旄門前列

采桑子

送辰溪之官浙水

溫竿偶擁皋比坐開卷登堂君在東牀一笑相逢意氣揚 垂

青竟把虛名賞謂我文章不比尋常刻劃無鹽作劬娘

乙巳余在邱生

大桐家投經始見君君邱氏婿

當時編紉皆豪俊賭酒論詩拂袖掀眉自信千秋位置宜而
今好事都消歇折柳安之聞笛更悲死別生離淚滿衣

秋風吹我他鄉去嶺樹如煙江草如絲十里斜陽馬一鞭是

時君向家園住自寫濤箋自撥銅絃挑得風騷擔上肩

吹燈寫盡懷人句無數關山無限悲歡千里迢迢一紙看縑

袍顧我寒如此相勸加餐相望平安相見獨憐兩鬢斑

人生萬事真難料忽起風波輒喚奈何過眼浮雲春夢婆小

官也應療貧計莫怨蹉跎莫趁銷磨十月微霜且渡河

君年來多失意

事乃作
出山計

枕戈夜半聞雞舞望汝飛騰拔幟先登殺賊應知上馬能寄
巢風月猶無恙祖武是繩天籟代興對樹吟哦不負丞

滿江紅

喜晤文樵

薄醉將歸杯酒間傳聞消息五百里故人忽至停雲在卽兩袖
方收懷舊淚三年長冷孤飛翼趁一燈風雨便相尋歡心極
天何故偏昏黑人將老猶南北嘆幽蘭不笑瘦松無色醉夢樓
臺方賭酒淒涼文字空磨墨看海枯石爛兩人心終相得

前調

讀劉壽之三才詞拈贈

香草美人好懷抱風騷有幾便拈毫鋪紅染翠畫皮而已熱血
誰從狂膽噴豪絃陡令雄心起能酣嬉跌宕學蘇辛千秋矣
山有色煙霞美天有骨風雲喜且自家閉戶鬚眉料理手筆敢
居臺省下眼光直滿乾坤裏看他年揮灑上凌煙奇男子

前調

劉贊軒襄屢以酒勸作此答之

酒膽無多更今日消磨盡矣最怕是三杯入腹牢愁易起不俗
已驚時輩眼多言更駭旁觀耳笑狂奴非醉亦非醒癡而已
君方少才華美吾將老年華駛算生平不合糟邱生死作達安

能皆樂境盡歡還要逢知己儻一時失檢學灌夫誰堪此
清平樂

燈光漸小滿地蛩聲悄習習好風天未曉又把幽蘭開了
牆
肩十笏秋山可憐眉月彎彎欲檢閒情一賦從頭寫與伊看
無言悄悄冷煖自家曉四十到頭忙未了萬事讓人年少
西
風長夜漫漫那知如此人間合與鴻妻伶妾歸來綠水青山
百字令

爲楊雪邨題渡江擊楫圖

蒼茫若此看昂然意氣居然奮發不見驚濤飛滾滾萬點英雄
熱血多少扁舟都如夢寐骨肉刀頭割先鞭儻著雙眸此際應

豁 纔曉攬轡躊躇得時則駕一葉休輕撥須學將軍橫海去
十萬樓船空闊挂劍扶桑煙霞再造肯伴魚龍活枕戈待旦故
人自愧華髮

東坡先生集
酒邊詞五

賭棋山莊集 酒邊詞六

長樂謝章鉞校如

賀新涼

感作同文樵

寂寂何爲者看天地許多變態無端驚怕徹夜西風門外吼熱
血如濤亂瀉四十載二毛盈把壯不如人今將老嘆西施弗字
無鹽嫁誰肯信良工也從今莫作騷壇霸或提刀殺賊得死
沙場也罷若輩不如人意甚休怪鮑生善罵好男子自饒聲價
青史終教名姓在便寸膠要補黃河罅君記取今宵話
憶秦娥

戲簡贊軒時贊軒新構金屋

花魂凍錦衾纔做迷離夢迷離夢桃花引蝶桐花偎鳳情絲
密織無些縫黃金鑄汝心頭供心頭供琴聲乍起月痕漸重
憶少年

中秋風雨

無端星暗無端風大無端雨急曉窓忽驚起問海棠消息碧
海青天閒自得算幾度團圓時節嫦娥耐孤冷不照人顏色
浣溪紗

十六夜見月

急補團圓未是遲花陰悄立已多時秋光僥倖接蛾眉不雨

不風天乍好照儂照汝影堪疑人何消瘦月何肥

點絳脣

十七夜聽雨

又做陰陰秋天不管秋雲溼梧桐響急夜雨當階滴
自起挑燈無奈閒愁積悄然立寒聲四壁颯颯風吹入

浣谿紗

庭際老少年數本鮮紅可愛

恰似微霜醉曉楓最宜種汝短籬東不花偏作可憐紅
秋氣一庭方瑟瑟離情滿眼正怱怱一叢冷露一叢風

點絳脣

無賴東風小窓忽送飛花入有人暗泣獨抱幽香立 一縷一絲不覺濃陰積今何夕酒寒燈碧暮雨瀟瀟急

憶少年

離離花影沉沉燈影瀟瀟鬢影無言坐相對看眉痕漸緊 今雨不情偏做冷有多少春光誰省小窓黑如漆這淒涼共領

賣花聲

春柳綠初齊春草萋萋鷓鴣底事盡情啼不見牡丹亭子畔日已沉西 清夢一簾低雨晦風淒流光似水誤雙棲檢得新詩思破悶又是無題

憶王孫

只怕濃陰天亦惱
剩幾點春光漸老
海棠庭院寂無人
青不了
離離草
寒雲如捧煙如抱
盼不到廣寒怎好
對花那便說無
情急打疊相思稿

南鄉子

百感又心頭
那忍登高豁遠眸
轉瞬江南千萬里
悠悠人逐楊
花共下樓
勉力學沉浮
太史文章走馬牛
到此應知投筆好
兜鍪也竊人間萬戶侯

前調

那敢望封侯
那得騎鯨汗漫游
如此江山辜負盡
多愁卅載秋
風易白頭
門外水如油
萬點寒花逐水流
流到人間誰管得

知不何處斜陽不下樓

末句用符雪樵先生語

好事近

積得許多愁不解銷愁何處欲向碧桃花下與啼鶯細訴
雲
癡雨倦兩茫茫獨抱傷心去聞道鬱金堂上落燕泥無數

虞美人

子規聲裏春寒透暮雨梨花瘦銀燈今夜太無情偏照
影到天明
鸚哥那忍將人罵儂已銷魂怕長亭黯黯柳依依
獨自夢伊憔悴夢伊肥

南鄉子

熱血不能寒冷到心窩也是難自唱陽春湖海去偷閒談笑危

樓獨倚闌 壘塊滿空山小石無言大石頑如此風雲天亦嬾
開顏幽谷焚香禮素蘭

攤破浣溪沙

卻與天孫易渡河鵲橋橋下少迴波都化小窻無賴雨奈愁何
滴滴頻添淚眼多愁痕獨捧鎖眉窩偷得霓裳零落盡不堪
歌

買陂塘

桃花

悄東風破寒弄暖溶溶春色如水嫣然一笑含情立微醉佳人
初起神仙地算到底阮劉塵俗難安置肯將伊媚看瘦到斜陽

紅深碧淺枉把故山記
當年事豔夢催醒也未歸來門巷猶
是愁痕都把脂痕掩忍向闌干獨倚相思字便寫與伊看伊也
無言矣繁華難恃歎流水無情孤舟自遠剩得別離味

南歌子

和梁禮堂

鳴謙韻

綠閣瀟瀟雨又添點點煙似愁似病不成天只好泥伊閒話鏡
臺前引笑頻牽手偎吟莫聳肩客程回首便三千忍到明年
憔悴想今年

南樓令

雨歇尋符雪樵

兆綸

先生不遇循城望郭外諸山葱蒨可愛

用稚黃體拈頃

掠水斜斜燕接陰黯黯鶯看遠山雲外深深恰似佳人新病起
畫不就瘦眉青雨歇泥偏滑煙多路未明問綠陰何處眠琴
恍惚箇儂低唱去猶聽得兩三聲

愁倚闌令

重柳外讀書臺半塵埃流水低低煙漠漠菜花開消除清福
堪哀問何時重立蒼苔孤負垂青山戀我過橋來
長亭怨慢

楊花

忽添出別離情緒不解東風吹伊何處纔歇斜陽和煙飛過又

無數纖愁鋪悶偷幾刻安閒住住又不多時偏只管飄零如故
細觀看空中蕩漾點點非花非霧輕狂如此曾記得多情分
付須早早化作浮萍祝流水送卿歸去莫再逐芳塵恐被陌頭
泥污

祝英臺近

柳低搖花亂落眼色上簾幙絮語雕梁歸燕並棲樂誰知滿地
斜陽東風無力吹不暖秋千鈴索暮雲惡遮遮掩掩不見舊
樓閣欲訴離情屢睡又難著但求今夜淒清今生消受卻能免
來生飄泊

聲聲令

久雨見月作

花濃有影鳥噪無聲寒光乍墜一星星
曹騰無力做不出十分明似佳人宿醉初醒
獨帶輕陰便隱約總多情夢魂昨夜尙
沉沉團圓相對忽而今太瘦生莫廣寒宮闕淒清

齊天樂

晨過環碧軒

柴門雙敞春陰裏滿地菜花浮綠水
皺新痕山窺遠黛掩映青
青喬木樓臺斷續問幾處曹騰東風眠熟爲謝紅塵幽居真欲
此間卜曾閱滄桑幾度但十分冷落結構須速添箇小亭移
來短棹更種垂楊修竹都無點俗怕措大生涯難消清福招我

故人開尊譔一曲

綠意

新竹

籬根雨足看涼痕低亞蒼翠如玉幾葉蕭疎扶上輕陰便占修
闌一曲佳人生小真憐汝問誰憶天寒空谷莫瘦魂夢到瀟湘
一樣春衫搖綠知否幽居寂寞多情寫幾字食可無肉一醉
春風早解虛心卻喜此君非俗平安從此殷勤報好留與鳳皇
棲宿盼甚時纔得淩雲書入故人雙目

意難忘

和宋已舟

謙

忽降虛空莫雨間
磅礴鑄出英雄神
清偏愛馬臂健
欲鞭龍雙眼白一腔紅
更萬竅玲瓏射斗牛
其精耿耿其燄熊熊
多情還自惺忪
總爲花望露替柳嫌風
鴛鴦同命鳥蝴蝶
可憐蟲豸背國廣寒宮
看酒醺愁濃一片心
五光十色閃爍於中
齊天樂

春草

萋萋忽滿天涯路
從此故人竟去瘦馬嘶時
哀鴻過後青入亂山無數
送君南浦問流水何心頓成
今古誰道忘憂離離都做
斷腸苦 不管淒涼煙雨但
高黏落葉低捧飛絮野火難
燒春風易長僥倖此間狐兔
旁人方妬算遠志出山銷魂
何補且去

蹋青婆娑相對舞

念奴嬌

花朝同徐雲汀

一

林錫三

天齡

梁洛觀

履將

已舟禮堂壽

之贊軒集百花傳舍

得來香界學長生不踐紅塵非錯沉醉花前須萬徧忍聽春光
寂寞味不嫌真酒何妨濁健咏人如鶴花當解語亭亭招我簾
幙况復幾疊青山數間矮屋隨處堪棲託梅是山妻桃是妾
各自腰肢肥削替汝溫存防伊冷落豔福何曾薄不應買渡一
舟歸去飄泊

玲瓏四犯

簾影

窄地如波波光盪漾此中想有人住迷離渾不定恍惚又來去
捲時一絲絲露不捲時一重重霧篩碎愁痕飄零滿地不耐此
時若樓臺蒼茫無數看明纔映日暗還礙樹玉鈎雲一片歸
燕遲遲颺忽然撩亂微風起又串出爐煙幾縷門前路濃陰總
沉沉何故

珍珠簾

寓齋牡丹一本忽爲沙叱利所得

不曾貪識金銀氣忽飄零去也隨人安置富貴亦空花況茫茫
塵世芳草無情天似夢算何處樓臺堪寄須記囑收拾東風天

香長闕 卿自國色娉婷問鈿車寶馬紛紛何意不見謫仙人
便品題無字多買胭脂真濁物只合畫桃奴菊婢知未看人喜
如顛花愁如寐

滿江紅

酒邊同禮堂縱談作

百鍊成鋼禁磨折也關根器令斯人蹉跎不出天非無意萬至
攫拏龍虎健一時得失雞蟲戲莫慍慍新婦閉車帷無生氣
頭雖俯人猶忌心則熱吾自記便旁觀笑罵應之曰是大錯誰
憐天下鑄長生合與人間計挾區區幾字遂千秋非其至

一落索

寒食

獨夜慙慙正苦背燈聽雨曉牕忽閃玻璃紅有三兩黃鸝語
暖到垂楊幾縷濛濛飛絮好風扶起瘦腰肢逐蝴蝶花深處
忽憶當年眉嫵妙嫵無語六銖仙骨五銖衣風過也飄飄舉
豔夢頓成今古深杯誰賭楊花無力到天涯寄不得相思苦
滿江紅

挾盡籬籬且陶鑄乾坤真氣知近日英雄不在尋常富貴屠僧
能爲公子死緯繆也替宗周討奸風雲切莫染腥羶鮑魚肆
腐鴟嚇祥鸞避怪鼉嘯潛龍逝忽黃雲四塞天平何意赤仄難
填詩禮冢黃嬌偏醉人間世問獠牙有鬼攬頭顱能無悸

珍珠簾

清明酒樓餞禮堂游吳

戀春最怕春光晚倩春風扶過牡丹池館簷柳絲絲把愁魂
低縮乍暖乍寒天易暝數不盡鶯嬌蝶嬾休管喜舊雨猶留開
尊酒滿去也把臂登樓且盡歡強醉多情爲伴濃笑雜狂歌
要歸來緩緩從此扁舟千萬里得幾度並肩扶繖青眼望襟上
酒痕他鄉慢浣

金縷曲

分詠得游夢戲填

頓覺乾坤窄十萬里颺輪電馬飛行無迹忽到瑤池偷酒盞忽

倚蓬萊吹笛忽獨坐玉樓百尺沉醉又乘青鳥去笑一杯海水
沉沉碧星如豆月如璧 回頭一顧人間寂卻騎鯨歸也隻手
江山投筆何處風雲蠻觸闢何地滄溟鵬擊且游戲天門執戟
不負故山猿鶴嘯踏煙霞更著傳家屐便夢也悠然適

書夜樂

窺竹精舍重賞牡丹

百花報道王歸矣忽天外飄香至滿庭搖漾春光池水盈盈亦
媚但恨紅塵吹未已忙不得瑤臺料理病酒正無聊向窻前驚
起 一場富貴方無比偏不厭頭巾氣想因寂寞人間不耐別
離滋味第一相思還戀此且閉戶替卿安置莫羨沉香亭算飄

零容易

桂枝香

題余澹心板橋雜記後

河山已矣況一曲秦淮傷心之地漫數當年門巷水溫樓媚老
天著意妝脂粉李家香柳家如是憐才能賞多情能俠也非容
易剩一老飄零未已寫不盡淒涼淚痕滿紙變調黍離幾輩
效顰堪比過江馬阮真無賴賣英雄歌舞聲裏誰知今日板橋
橋畔狼烽又起

三姝媚

前題

疎狂還有我憶青樓當年多情亦頗亂擘吟箋看朝雲捧硯東
坡高坐得意便歌甚魚肚才名難到傷別傷春無數新詩自家
傾倒好夢而今都過尙欲借東風種花千朵陶寫雄心算酒
邊同伴非君不可淒絕湘江問何處薦君香火且錄烏絲一卷
懸之門左

漁心與杜子皇白孟調齊名世
稱魚肚白魚肚自金陵染色也

賭棋山莊集 酒邊詞六終